

2 San Juan

Ti melele schi'uc ti c'uxubinele

¹Vu'un ancianoun, ta jts'ibabot talel ti jcarta li'e ti vo'ote, Quermana, ti t'ujbilot yu'un ti Diose schi'uc ti avalabe, ti c'uxoxuc ta co'nton ta melele. Ma'uc no'ox ti vu'un c'ux ta xca'ioxuque. Ja' jech xtoc c'ux ta xa'ioxuc ti buch'utic laj xa yojtiquinic ti melele. ²Ti vu'un ti c'ux ta xca'ioxuque, ta sventa ti oy ta co'ntontic ti melele, ti jech oy ta co'ntontic sbatel osile. ³Ta sventa ti oyoxuc ta stojol ti melele, ti c'ux ta xava'i abaique, ja' yu'un un, ti Dios Totile schi'uc ti Cajvaltic Jesucristoe ti ja' Snich'on ti Jtotic Diose, ac'o yac'boxuc bendición, ac'o xc'uxubinoxuc.

⁴Ep ximuyubaj xa ti c'alal laj ca'ibe sc'oplal ti oy jun chib avalab ti lec xch'unojic ti melele jech chac c'u cha'al yalobjotic ti Jtotic Diose. ⁵Avi tana un, Quermana, ta jc'anbot vocol ti c'ux ac'o ca'i jbatit ta jujun tale. Ti jech ta jts'ibabot talel li'e, mu yu'unuc ach' mantaluc. Yu'un ja' ono'ox ti mantal ti lic ca'itit talel ta sliquebale. ⁶Mi oy sc'uxul co'ntontique, ja' yu'un un, ta jpastic ti c'usi ta xal smantaltac ti Diose. Ti smantal ti lic xa ono'ox ava'iic talel ta sliquebale, ja' ti oyuc sc'uxul co'ntontique.

Ti jlo'lavanejetique

⁷Oy xa ep jlo'lavanejetic ti bu'yuc no'ox ta xanavique, ti mu xch'unic ti co'ol s'elan bats'i vinic ital ti Jesucristoe. Ti buch'u jech yo'ntonic taje, ja' jlo'lavanejetic, ja' yajcrons ta Cristoe. ⁸Jech o xal un, bijanic me yo' mu jeche'uc no'ox ta xch'ay ti avabtelique, yo' jech ts'acal lec ta xavich'ic ti amotonique.

⁹Buch'uuc no'ox ti ta stoy sbaique, ti ma'uc ta sventainic ti c'usi ichanubtasvan ti Cristoe, mu'yuc ti Dios ta stojole. Yan ti buch'u ta sventain ti c'usi ichanubtasvan ti Cristoe, oy ta stojol ti Dios Totile schi'uc ti Nich'onile. ¹⁰Mi oy buch'u ta svu'lanoxuc ta anaic ti mu co'oluc ta xal ti c'usi ichanubtasvan ti Cristoe, mu xavac' ochuc ta yut anaic, mu xavich' ta muc. ¹¹Yu'un ti buch'u ta xich' ta muq'ue ta sta ta maquibel ti c'usi chopol ta spase.

Stsutseb ti c'ope

¹²Oy to ep ti c'usi ta jc'an ta xcalboxuc ava'iique, pero mu jc'an ta jpas ti ja' no'ox ta carta ta ts'ibe. Pero jpatoj co'nton ta xca'i ti chtal jq'ueloxuque, chtal jchi'inoxuc ta lo'il jtuc, yo' jech xijmuyubajotic jcotoltic.

¹³Ti achi'il ta voq'uel ti
t'ujbil yu'un ti Dios xtoque,

chabanucot xayalbe ti yalabe.
Jehuc